

國朝耆獻類征初編

國朝耆獻類征初編

國朝賢媛類徵初編卷三目錄

敬二

金兆燕妻晉氏

王綬章妻陸氏

秦恩復妻汪氏

陳大煜妻郭氏

郭汪璪妻吳氏

魏晉妻劉氏

彭宜仁妻曾氏

陳源充妻易氏

送宜口張曾刃

贈張曾刃

贈王冠其吳刃

贈王冠其刃

秦恩鄭其王刃

贈大恩其刃

金兆燕連晉刃

王兆燕連刃

題二

附錄

國朝賢媛類徵初編卷三

通奉大夫前署江西巡撫江西布政使司布政使湘陰李桓輅
敬二

金兆燕妻晉氏

孺人卒於乾隆四十八年十月二十五日踰月渴葬未有志銘既
小祥兒子臺駿請於余曰大人爲人作傳多矣盍爲吾母立傳余
應之曰古者婦人無傳自劉向編列女范蔚宗作後漢書乃因之
有列女傳汝母處隆盛之世隨余以卑秩受七品封無異行可
述不傳可也然一二瑣事有可以爲子孫訓者試爲汝告之孺人
姓晉氏余同里人年二十歸於余余家貧甚孺人家亦貧嫁之夕

假他氏衣飾迎以至廟見後脫釵易裙襖入廚操作無幾微不豫色是時余以鄉試失解而得補獲雋者之缺爲廩膳生聞者且慰且賀孺人曰此小得失何足言大丈夫當以文行高天下富貴貧賤身外事也余時爲他宅童子師所得脩贄皆以奉堂上私室不名一錢同里吳岑華先生父執也贈余白金三兩適孺人伯父有市肆在蒙塾之側謂孺人曰以此置吾肆每日與爾子錢三孺人諾之余蚤出暮歸歸卽持三錢來孺人一月可得九十錢而私用足丁卯歲余與外舅同舉於鄉或謂孺人曰汝聞夫捷不如父捷之喜何也曰吾父老矣不可以更有待矣戊辰會試余與外舅俱下第余歸新安省視先府君於休邑署中而外舅客游山左俄卒

於歷城凶問至孺人水漿不入口者數日然以隨任官署泣而不敢哭府君曰聞訃而哭禮也乃設位遙奠命之哭孺人一哭失聲悶絕者竟夕奔喪歸里由新安富春取道杭州至京口渡江而北塊居舟中終日掩袂余上嚴陵釣臺謂孺人曰此古之高士伊之妻仙人梅福女也孺人泣曰君慕嚴子陵是也梅仙此時可再見乎嗚咽久之仲妹之夫孺人之從弟也迎娶歸余同舟抵京口孺人誠其從弟曰此地人稠雜而汝屢登岸以鮮服邀其間盍慎諸是夜果被偷兒盡竊其衣以去府君致仕歸家益貧余爲菽水客游四方視膳謁醫惟孺人是賴辛巳落第歸省府君病已篤與孺人扶持左右晝夜不眠者三月治喪甫畢冰雪之中仍卽飢驅而

出是時持空囊居者無儲粟但於靈幃前相持一慟而別回顧孺人身上尙無複襦也丙戌余得第聞璉孫生旣南旋仍畱滯邗上而孺人於九月染時疾幾殆余聞之遽歸旣愈余詢孺人致疾之由孺人曰九月十四日君舅忌辰捧杯酒酌水主前因思今年兩事皆君舅所最望之切者而獨不得見淒哽於中垂淚而食因致疾耳戊子春余得揚州教授將之任孺人曰骨肉至親待食者眾恐廨舍不能容也乃獨與余先拓其旁宇盡迎以來署以內食指七十一日食五斗米內外大小井井然每日饋以巨案羅梓碗竟丈餘孺人一一均授之畢然後食或自食無鮭菜則均分已罄矣庚寅夏豕媳亡有人欲爲臺駿謀繼室者孺人曰君以從弟之寡

妻孤子鞠育至今今其子已長尚未婚一不了事也亡友之子攜之來者才俊人也爲之聘亦當娶矣於是先爲從子娶爲亡友之孤娶而後爲臺駿繼娶焉長女早寡攜其孤女大歸有高郵秀才在賓館中孺人器其才以外孫女妻之秀才曰吾孤貧僅有一弟吾贅於此吾弟將若之何孺人曰招汝弟來可共處也其弟甫十歲處余家數年遂讀書能文克自成立璉孫童幼能詩友人有女年相若亦讀書耽吟詠欲以儷之孺人曰娶婦嫻女工任中饋足矣閨房之中朝夕唱和男子則學業荒女子則家政廢甚不可也卒辭之余以知縣需次迫就銓孺人曰君才疏而性曠不可任百里也乃以國子官遷擢去己亥冬余入京供職孺人挈全家以歸

辛丑余歸里孺人年六十矣壬寅爲璉孫納婦癸卯余客揚州孺人卒於家

櫻亭子曰不用婦言而亡古人悔之余以國子官請急歸里絕意仕進仍得於山水花月之地嬉娛暮年孺人一言之力也交游半天下而知己乃在閨中不異與

右傳金兆燕撰

王經章妻陸氏

孺人姓陸氏太原舅氏經章王公之元配其先世出宋丞相陸秀夫後伯祖某康熙壬戌進士通政司使祖某庠生考某太學生世居婁之冠裳路所稱冠裳陸氏也孺人幼孤其舅瑯邪王稼軒先生自富陽令歸里與外伯祖寬齋公雅相善也以故稔知孺人少時卽躬習勞苦公曰是可以爲我家婦遂締姻焉年二十五歸於太原太原族望甲婁郡其子姓每以閭閻相矜尙獨舅氏家自高曾以來累世勤樸及孺人來歸百事操作尊嫜以爲賢愛之異他婦而孺人睦於妯娌無閒言寬齋公出宰粵浙三仕三已里居之日家無長物授田不及百畝舅氏乃棄舉業治生產以奉菽水孺

人伙助之家日益起構新居於鎮民橋西距老屋不半里就隙地
闢爲圃菜蔬瓜果之屬孺人皆手植晨夕課僮僕引輓轡循畦灌
之嚴霜烈日不以爲苦圃之旁種梅蒔菊春秋佳日開筵介壽時
外祖容齋公以廬守歸田與寬齋公白頭昆季笑語銜盃未嘗不
歎孺人之能致其養也性儉約不自華飾雖苧衫絮襦被敝弗改
爲寵媼嬖婢皆爲縫紉教子勤於學教女勤於女紅教諸婦勤於
婦職凡瑣屑勞苦之役輒身先之故庭闈之間皆以習勤爲業孺
人之教也嗚呼婦德之難也世閥之家抑又甚焉有肥甘精鑿之
奉以佚其體有金玉錦繡之美以侈其心終身娛樂罔恤艱苦甚
至家門中落囊食交謫而閨闈晏安之毒不可藥石乃孺人以世

家之婦四十餘年手口卒瘡以謀家室不賢而能若是乎今歲之臘將爲諸子分爨盎缶釜甑之物先事部署井井有法冬至前數日邁溫證投以涼劑弗效遂卒享年六十有六子服政乾隆庚子科舉人服庸庠生服言女八孫三人女孫二人

論曰善乎魯敬姜之訓曰勞則思逸則淫其言可爲婦誡矣我母太夫人出自太原與舅氏爲同祖姊弟孺人之來歸也太夫人猶在室嘗言孺人作新婦二日卽親羹臠鍼縷之事故太夫人燕居訓子婦及諸女亟稱孺人賢以爲勸勵舅氏屬學金作家傳弗敢以諛辭私於所親敬述習聞於太夫人者詮次之嗚呼若孺人者可謂善用其勞哉

右傳汪學金撰

秦恩復妻汪氏

江都西巖秦先生以詞臣名宿敷歷中外而令嗣敦夫編脩繼起
領史職可謂榮遇矣頃敦夫遊吳乃以室人之喪過時猶悲奉先
生所譔事略屬予爲銘以待瘞諸幽按安人姓汪氏歙縣人徙儀
徵候選布政司理問堅之孫候選知府文璩之子敦夫名恩復由
乾隆丁未進士至今官幼聘編修華亭王君嘉曾女未娶卒故安
人歸焉時乾隆四十三年也西巖脂膏不潤自謝政歸里日鍵戶
課子讀書爲事泊然仍一儒生門以內無絲竹珍玩之娛無擣菹
蹋鞠之戲安人雖生長綺紈而不喜鉛華淡素之風意甚樂之衣
輒屢澣濯帷幔數年不更中裙和服補綴爲多嫁衣在笥者恆局

鏹不御曰吾安其舊不取其新也逢舅姑生辰及令節手治一卮上壽與敦夫相對莊敬勉其勤學敦夫試於學使列高等食廩餼安人激勸有加夜漏數十猶誦讀或西巖命題課作文一鎧熒熒安人儲侍茶湯必俟繕寫竟始就寢敦夫舉於鄉得末疾安人經營藥裹衣不解帶臥不交睫乃獲痊結褵數年中不聞勃谿聲焉其婦德飭備如此安人舉一女殤再產又得女西巖惟一子望孫甚迫安人曲體舅姑意出私財爲置妾楊氏待之甚厚尤恆情所難以暴疾卒於乾隆五十年三月十八日距其生僅得年二十有六厝城北方家巷之高原自安人之歿而敦夫成進士入翰林用夫恩得 贈安人繼室江西永新令海甯陳君存矩女舉子成謀

妾楊亦舉一女安人所舉女年已十三許字吳氏皆安人所期望者今皆遂足以慰泉下願已不及見矣此敦夫之所以過時而悲也吁以秦氏家門鼎盛而敦夫之悲念安人無已且西巖追述子婦之行淚墨交揮不自禁則安人之賢不可徵哉在易家人之九五王假有家交相愛也說者云夫愛其內助婦愛其型家然則夫婦相愛非暱也情之正也聖人固明著其象於經矣是可書也銘曰

右族之女詞臣之妻婉婉淑範肅肅令儀良璧忽墜芳蘭易摧君舅文愴夫子情哀婦德之美不在多奇彤管用紀翠珉永垂

右墓誌銘王鳴盛撰